《八識規矩頌》

唐·三藏法師玄奘 造

前五識頌

性境現量通三性,眼耳身三二地居。 遍行別境善十一,中二大八貪瞋癡。 五識同依淨色根,九緣七八好相鄰。 合三離二觀塵世,愚者難分識與根。 變相觀空唯後得,果中猶自不詮真。 圓明初發成無漏,三類分身息苦輪。

第六識頌

三性三量通三境,三界輪時易可知。 相應心所五十一,善惡臨時別配之。 性界受三恆轉易,根隨信等總相連。 動身發語獨為最,引滿能招業力牽。 發起初心歡喜地,俱生猶自現纏眠。 遠行地後純無漏,觀察圓明照大千。

第七識頌

帶質有覆通情本,隨緣執我量為非。 八大遍行別境慧,貪癡我見慢相隨。 恆審思量我相隨,有情日夜鎮昏迷。 四惑八大相應起,六轉呼為染淨依。 極喜初心平等性,無功用行我恆摧。 如來現起他受用,十地菩薩所被機。

第八識頌

性唯無覆五遍行,界地隨他業力生。 二乘不了因迷執,由此能興論主諍。 浩浩三藏不可窮,淵深七浪境為風。 受熏持種根身器,去後來先作主公。 不動地前纔捨藏,金剛道後異熟空。 大圓無垢同時發,普照十方塵剎中。